



ATASSUT

UPA14/165

Gerhardt Petersen

05.06.2014

Nunaqarfinni illoqarfinnilu isorliunerusuni ineqarniarnikkut pissutsit ilungersunartut qaangerniarlugit illunik kiisalu aserfallassimasunik nutarterinissamik anguniagaqarluni suliaqartornissaa pillugu apeqquteqaat aallaavigalugu oqallinnissamik siunnersuut.
(Inatsisartuni Ilaasortaq Hans Enoksen, Partii Naleraq)

ATASSUT-miit oqallisissiamut siunnersuuteqartoq Inatsisartuni Ilaasortaq Hans Enoksen, Partii Naleraq qutsavigaarput.

ATASSUT-miit oqallisissiaq pitsaasoq amerlasuutigullu illuutitut tamanut iluaqutaasussamik siunertaqartoq imatut oqaaseqarfigissavarput.

Sinerissami tamarmi, aamma isorliunerusuni illut pingaartumik 1960-70-80-kkunni illuliaasimasunut suli amerlasuut illuminnut akilersuipput, ilaatigut ukiut siuliini illup nutarsarneranut, imaluunniit allilerisimanermut atukkat utimut akilerarlugit. Sinerissami inoqarfinni tamani nunaqarfippassuarnilu pisortat illuutaat qanganitsersimaqisut ikigisassaangillat, ilaatigullu ATASSUT-miit paasisinnaalluartaqpagut attartortut paatsuungassuteqarsinnaasarmata sooq – sumullu suli akileraajuarnelutik.

ATASSUT-miit ilisimavarput illut pineqartut matumani atortorissaarnerup tungaatsigut ullutsinnut naleqqutinngiivissunik kiassaateqarnermikkut inissisimatinneqartut, kiassaateqqat “skibsovn”-itut taaneqartartut annertuumik atugaallutik, tamakkulu peqqussuunissaq eqqarsaatigalugu ullutsinnut naleqqutinngiivillutik.

Maannakkut killiffimmi ullutsinnut naapertuuttunik inissianik inissaaleqineq inoqarfinni tamaginni annertuvoq, pingaartumillu pineqartumi matumani isorliunerusuni ukiuni kingullerni aserfallatsaaliuineq nutarsaanelu kinguussaqqaaq, ilaatigut ATASSUT-miit isumarput malillugu ilumut ukiut arlallit utaqqisitsisoqaqinnissaa eqqarsarnarluni.

Taamaattumillu ATASSUT-miit nutaamik eqqarsarluni aqqissuuseqqinnissaa peqataaffigerusupparput, attartortunut, aammalu illup attartukkap pigilersinnaaneranut periarfissanik allanik aamma aqqissuussinikkut. Tassami nassuerutigisariaqarparput ilumut nunatsinni inissaaleqineq ima annertutigisoq, illoqarfippassuillu nunaqarfiillu kinguussaqqaneri ukiorpassuarni suli inissialiortiternerit, illuliornerillu sanaartoraluarpata angummassinnaaneq qularnartoq, ATASSUT-miillu taamaattumik isumaqarpugut allatut aqqissuussineq pisariaqartoq.

Inuit attartortut piginnittunngorsinnaanerinut periarfissat sinaakkutillu illua-tungeriinnut pitsaanagerusut ilusilersortariaqarput. Taamaasiornikkut naapertuuttumik sumiiffinni tamani inissaaleqineq illua-tungaani annikillisinneqassaaq, pisortat sanaartornissamut aningaasat atugassat amerlaningussammata.



ATASSUT INATSIARTUNI

ATASSUT-miit ilisimavarput sinerissami illoqarfiit anginerit avataanniittut, tassalu isorliunerusuniittut nunaqarfinnilu aningaaserivinni atornissaminnut periarfissaqanngingajapput, periarfissaqanngiivillutilluunniit, taamaammallu illumik aserfallatsaaliineq aamma nutarsaanerit assigisaallu attartortunut aammalumi piginnittunut oqimaatsorujussuusinnaasarluni.

ATASSUT-miit oqallisissiaq tamakkiisumik isumaqatigaarput, taamatullu suliniutit oqallisissiami qaqilerneqartut tapersiivigalutigit.

Taamatut oqaaseqarluta ATASSUT-miit oqallisissiamut siunertaqarluartumut qujavugut.